

Dinfwngz Guh Gaiqdajcang Ngaenz Dungcuz Sanhgyangh

□ Maj Veiyungz comz hoiz



▲ Lwgmwbk Dung Myauz raekdaiq doxgaiq dajcang ngaenz engq gyaundeiz.

Dahsau Dungcuz、Myauzcuz maijgyaez raekdaiq gaiqdajcang ngaenz, baez daengz cietheiq, daeg-bied dwg dahsau okhaq cungj aeu raekdaiq gak cungj gak yiengh gaiqdajcang ngaenz. Gwnz duqbyoem baek bae' ngaenz yiengh dujva duz-mbaj, rwz raek soijngaenz, gwnz hoz naj aek raek gyongxngaenz lienhngaenz, gwnz fwngz daiq goenhngaenz haedfwngz, mbangj gwnz ga lij miz goenhroix ngaenz dem, lumj duzmbaj mbinyegyeg lumj duzfungh mbe fwed, lwenqda ndeiawj.

Ciuh gij siengjaeu bouxcawx, canghdizngaenz sien dawz gij ngaenz yungzlien gvaq de guh baenz vengq-mbang, baenzdiuz roxnaeuz diuzsei, yungh gij dinfwngz at、mbon、deu、gviet doenghgij banhfa neix, guh ok gaiqngaenz rizraiz gyaqciq gak cungj gak yiengh de, riengzlaeng caiq doenggvaq hanhswnj roxnaeuz san-laenz baenz gaiqngaenz gyaundeiz yinxvunz de. Sanhgyangh Dungcuz Swciyen Bazgyangh Cin Fuzdenz Cunh Mbanjlinzfuz youq ciuhgeq couh miz canghdizngaenz baengh song faj fwngz guh gaiqdajcang ngaenz lo. Youq gyoengq canghdizngaenz ndawde, gij dinfwngz Vuz Gungnwnz cungj ndei gvaq bouxwnq. Vuz Gungnwnz gauhcungh bizyez le couh riengz daxgoeng de hag guh gaiqdajcang

ngaenz. 30 lai bi gvaqdaeuj, aen diemq goenhsoij de yienznaeuz senj baenz geij mbat, hoeng mbouj lwnh senj daengz lajmbanj roxnaeuz yienhsingz, bibi cungj miz haujlai dahsau roxnaeuz lwgmwbk Dungcuz、Myauzcuz riengz gij mingzdaeuz de daeuj ra de guh gaiqdajcang ngaenz, daengz okhaq、camhaq yungh. Seizneix, Vuz Gungnwnz couh youq Sanhgyangh yienhsingz aendiengzhong gaebgeb haenx guh gaiqdajcang ngaenz minzcuz vunznoix, ndawde aendaiz guh-hong couh ciemq bae diengzhong baenz dingz dieg, gwnz daiz miz baenzdauq hongdawz guh gaiqdajcang ngaenz haenx, lumjbaenz aen vanj iq coux sa' ngaenz, aen ruqrin aeu ma



▲ Canghdizngaenz dizguh gaiqdajcang ngaenz.

langh caep raemxngaenz caeuq gij hongdawz mbouj rox coh daengj. Gwnz ciengz diengzhong cix venj le haujlai gaiqdajcang ngaenz gaenq guh ndei haenx.

“Gijneix dwg cungj lienh' aek gyoengqvunz Dungcuz、Myauzcuz rangh Dahyungzgyangh song hamq raekdaiq haenx, neix cix dwg lienhngaenz vunz lai Dungcuz Bazgyangh Cin raekdaiq haenx, gij gyongxhoz neix hix dwg gij Dungcuz, gyoengq dahsau baehaq cungj aeu raekdaiq de……” Vuz Gungnwnz baez yiengh baez yiengh geq doxgaiq de guh haenx okdaeuj, naeuz dwk angqvauvau. Doenghgij doxgaiq neix cungj gig miz daegsaek Dungcuz、Myauzcuz. Mboujlwnh dwg goenhfwngz、lienh' aek roxnaeuz gyongxhoz, Vuz Gungnwnz cungj ndaej youq gwnzde deu ok gij dozanq gyaqciq. Vihliux hawj gij doxgaiq neix engq ndeiawj, de lij gaghag gij dinfwngz guh Gingjdailanz, daj gij yiengh rizraiz mehmbwk siuqseuq caeuq labnyumx haenx ra gij miz yungh, caiq

yungh ma guh gaiqdajcang ngaenz.

Doiq goenhfwngz ndeu daj sa-ngaenz yungz baenz raemxngaenz caiq diz guh baenz yiengh, youh youq gwnzde deu va daengj, cungj dwg baengh fwngz guh. Hoeng Vuz Gungnwnz cij aeu 6 diemjcong couh guh ndaej doiq goenhfwngz deu rim raizva cingsaeq ndeu, lienz guh lienh' aek caeuq gyongxhoz daengj engq fukcab haenx cij ngamq guh ngoenz ndeu couh ndaej lo. Gvaqlaeng, Sanhgyangh Dungcuz Swciyen bingz Vuz Gungnwnz guh “Lauxcangh Sanhgyangh”. De nyinhnaeuz neix dwg haenx dinfwngz de ndei, coi gij dinfwngz cienzdoengj baengh fwngz guh haenx hwngfat engq ndei. Gyoengq bouxcoz rox gij mingzdaeuz de le youh riengz de hag guh gaiqdajcang ngaenz minzcuz vunz noix haenx, bouxhag menhmenh couh bienq lai lo, daengz seizneix gaenq miz 3 boux lwgsae oksae. De roxnyinh gig miznaj, caiqlij maqmuengh doenghgij dinfwngz gwnzbiengz neix ndaej fatyiengz caeuq ciepciengz.



▲ Lauxcangh aeu feizhanh yungz ngaenz.



▲ Gij haedfwngz gya miz Gingjdailanz haenx engq ndeiawj.